



Pou Piblikasyon Imedya: 24/08/2023

GOUVÈNÈ KATHY HOCHUL

GOUVÈNÈ HOCHUL MANDE PREZIDAN BIDEN POU LI ÒDONE GOUVÈNMAN FEDERAL LA POU BAY OTORIZASYON TRAVAY, SIPÒ AK ABRI POU PLIS PASE 100,000 MOUN K AP CHÈCHE AZIL NAN ETA NEW YORK

Gouvènè a ankouraje Mezon Blanch lan pou yo bay otorizasyon travay akselere pou moun k ap chèche azil yo, asistans finansye pou vil la ak eta a, itilizasyon teren ak etablisman federal yo ak ranbousman prèske 2,000 manm Gad Nasyonal New York yo

Gouvènè a anonse tou plan pou konekte moun k ap chèche azil yo ak anplwayè yo avèk of travay nan tout Eta New York

Repons kontinyèl Gouvènè a pou moun k ap chèche azil yo gen ladan 1.5 milia dola èd nan bidjè ane fiskal 2024 la, mobilizasyon prèske 2,000 manm Gad Nasyonal, epi bay sit Eta a posede yo pou moun k ap chèche azil yo

Ou Kapab wè lèt Gouvènè Hochul te voye bay Prezidan Biden lan [isit la](#)

Gouvènè Kathy Hochul te mande Prezidan Biden jodi a pou l pran mezi egzekitif epi diriye lòt resous federal bay Eta New York pandan l ap jere kantite san parèy moun k ap chèche azil yo k ap rive nan New York. Nan yon demann fòmèl Gouvènè Hochul te voye bay Mezon Blanch maten an, li te esplike demann espesifik ak annatant yo, ki gen ladann otorizasyon travay akselere pou moun k ap chèche azil, asistans finansye pou Vil New York ak Eta New York, itilizasyon tè federal ak enstalasyon pou sit abri tanporè, ak deziyasyon Tit 32 pou bay finansman federal pou prèske 2,000 manm Gad Nasyonal New York aktyèlman ki bay sipò lojistik ak operasyonèl atravè Eta a.

"Pandan plis pase yon ane, mwen te mande gouvènman federal la asistans ak sipò pou New York pandan n ap jere kantite san presedan moun k ap chèche azil k ap rive nan eta nou an", **Gouvènè Hochul te deklare**. "New York pa ka kontinye fè sa poukout li. Li pase lè pou Prezidan Biden pran mezi epi bay New York èd ki nesesè pou kontinye jere kriz sa a k ap kontinye".

Gouvènè Hochul te anonse tou yon pwogram ki pral elaji anpil kapasite Eta a pou ede moun k ap chèche azil yo jwenn travay legal byen vit. Gouvènè Hochul te mande Depatman Travay (Department of Labor, DOL) Eta New York pou ede konekte moun k

ap chèche azil ak opòtinite travay pou yo ka kòmanse travay imedyatman apre yo fin jwenn otorizasyon federal pou travay. Tout moun k ap chèche azil ki gen otorizasyon pou travay nan New York ka enskri kounye a pou asistans [isit la](#). Ekspè karyè DOL yo pral travay ak moun yo pou evalye konpetans, istwa travay, edikasyon, enterè karyè ak plis ankò, epi konekte yo ak anplwayè yo atravè Eta a. Anplis de sa, Depatman Travay Eta New York te lanse [yon pòtay](#) ki pèmèt biznis yo enfòme Eta a ke yo t ap akeyi moun ki fèk jwenn otorizasyon nan mendèv yo.

Aksyon jodi a se efò Gouvènè Hochul fè ki pi resan pou fè fas a moun k ap chèche azil ak migran yo k ap rive nan New York. Nan kòmansman semèn sa a, Gouvènè Hochul te anonsé yon envestisman 20 milyon dola pou ede akselere pwosesis depoze dosye pou plis pase 30,000 moun k ap chèche azil. Envestisman sa a baze sou 1.5 milya dola Eta a te déjà angaje pou sipòte Vil New York lè I bay finansman pou swen sante, depans pou abri, pèsònèl Gad Nasyonal, sèvis legal, ak pwogram demenajman volontè. Eta a te prete tou sit Vil New York yo pou itilize kòm abri tanporè ki kounye a loje plis pase 2,000 moun k ap chèche azil chak jou.

Tèks konplè lèt Gouvènè Hochul te voye bay Prezidan an disponib anba a:

Chè Prezidan Biden:

Eta New York te travay ak Vil New York pou jere arive yon gwo kantite migran ak moun k ap chèche azil nan New York pandan ane ki sot pase a. Arive moun sa yo te ogmante resous Vil la ak Eta a, te kreye gwo defi operasyonèl ak jesyon, epi li te enpoze demand akablan sou abri pou sanzabri nan Vil la. Mwen te ekri w nan kòmansman ane sa a pou mande sèvi ak sèten pwopriyete federal pou bay abri tanporè. Menmsi mwen apresye dèskou pran premye etap pou ede Eta a nan sans sa a ak angajman ou depi lontan pou yon apwòch ekitab pou imigrasyon nan fwontyè Sidwès la, defi nou fè fas yo mande yon repons federal ki pi solid. Avèk arive plis pase 100,000 moun k ap chèche azil ak migran nan ane ki sot pase a, ansam ak arive soutni plizyè santèn si se pa milye nan Vil la chak semèn, gouvènman federal la dwe fè patenarya ak Vil la ak Eta a pou jere kriz imanité sa a. Vil la ak Eta a te bay gwo finansman, anplwaye, ak jesyon ka pou moun sa yo k ap rive, jiskaprezan. Mwen ekri w jodi a pou m eksprime yon bezwen ki pi ijan pou gouvènman federal la pran mezi egzekitif epi bay asistans finansye empòtan pou adrese defi sa a.

Gen plizyè etap kle ke gouvènman federal la dwe pran pou reponn ak responsabilite li anvè New York.

Premyèman, gouvènman federal la dwe akselere otorizasyon travay yo. New York gen yon mache travay trè solid, epi Eta a pran angajman pou I bay moun ki gen otorizasyon travay yo sèvis plasman nan travay epi pou reyentegre moun ak fanmi ki te aplike pou azil. Jodi a, anpil moun k ap chèche azil ak imigran bezwen alafwa abri ak asistans finansye pou yon peryòd endefini tou senpleman paske yo pa ka travay legalman nan peyi Etazini. Otorizasyon travay la ap pèmèt moun sa yo reyentegre nan kominote yo pi vit. Gouvènman federal la ka akselere otorizasyon travay atravè aksyon

egzekitif tankou akòde ak pwolonje *Estatist Pwoteksyon Tanporè (TPS)*, espesyalman pou peyi tankou Venezuela, ki reprezante yon pati enpòtan nan popilasyon k ap rive a ak kote sitiayson sou teren an kontinye deteryore. Mwen sipòte tou itilizasyon pwogram libète imanité pou moun ki soti nan lòt peyi yo. Nou pa kapab fè pwogrè nan diminye kriz imanité nou fè fas nan New York san aksyon esansyèl sa yo ki dwe soti nan gouvènman federal la.

Dezyèmman, gouvènman federal la dwe bay Eta a ak Vil la anpil asistans finansye. Eta a te deja angaje plis pase 1.5 milya dola, epi dapre trajektwa ak planifikasyon aktyèl la, kriz sa a ta ka koute Eta a yon lòt 4.5 milya dola ane pwochèn. Dapre Majistra Vil New York la, Eric Adams, Vil la prevwa ke depans pou Vil la pral 12 milya dola pou sipòte moun k ap chèche azil ak migran k ap rive yo. Vil la ak Eta a ap fè depans nou pa t prevwa sa yo nan mitan resèt fiskal yo k ap bese pandan depans yo ap ogmante. Sa a se yon fado finansye ke Vil la ak Eta a ap pote nan non gouvènman federal la. Pandan ke Eta a apresye kontribisyon 145 milyon dola gouvènman federal la te bay nan inisyativ sa a, alokasyon lajan sa a pa ase. Depans pou bay sèvis ak asistans pou migran k ap rive nan New York yo wo anpil epi bezwen pou jwenn asistans federal la se yon bagay ki klè.

- **Sèvis Sante ak Sèvis Sosyal:** Eta a bezwen finansman nan men gouvènman federal la pou peye pou fè tès pou migran yo pou maladi ki ta ka reprezante yon menas pou sante piblik epi pou bay vaksen Covid-19 ak lòt vaksen; pou konpanse depans pwogram eta a yo atravè yon ogmantasyon nan pataje depans federal nan kad pwogram Medicaid (FMAP); epi sipòte sèvis konplè jesyon dosye yo.
- **Transpò:** Administrasyon Transpò Federal la gen yon pwogram Sekou pou Ijans, epi nou mande gouvènman federal la pou I dirije lajan ki soti nan pwogram sa a bay Otorite Transpò Metropoliten (MTA) pou sèvis transpò gratis bay migran ak moun k ap chèche azil yo. Jiskaprezan, MTA te depanse plis pase 2.3 milyon dola pou sèvis sa yo epi depans yo kontinye ap ogmante. MTA te oblige ogmante pri tikè yo pou pasaje New York yo pou ka konble diferans nan bidjè li yo epi MTA pa kapab bay sèvis transpò gratis pou migran yo sou yon baz kontinyèl san asistans finansye gouvènman federal la.
- **Asistans pou Lojman:** Depatman Lojman ak Developman Iben an gen pwogram sibvansyon pou lojman, ki enkli bon pou lojman Seksyon 8, ke yo ta dwe bay fanmi ak moun ki sanzabri ki elijib yo pou ede yo deplase ale nan lojman pèmanan, pou soulaje presyon ki genyen sou abri vil la, epi pou diminye gwo depans vil la pou abri yon lòt kote.
- **Edikasyon:** Depatman Edikasyon an dwe travay avèk Vil la ak Eta a pou ogmante resous nan distri lekòl yo ki wè ogmantasyon radikal nan popilasyon elèv yo kòm yon rezulta dirèk kriz sa a. Anpil nan migran k ap rive yo se fanmi ki gen timoun ki enskri nan lekòl piblik epi ki bezwen angle kòm dezyèm lang ak lòt sèvis sipò.

Twazyèmman, gouvènman federal la gen enstalasyon kle nan vil la ak zòn metropoliten ke Eta a ak vil la bezwen ijan pou bay abri tanporè. Sistèm abri Vil New York la ap pran swen plis pase 58,500 moun k ap chèche azil ak migran, epi kantite a kontinye ap grandi pa milye chak semèn. Vil la te ouvri plis pase 200 abri kòm repons a kriz sa a epi li pa gen espas. Anplis de sa, Eta a te bay plizyè etablisman eta a ki gen ladan ansyen Etablisman Koreksyonèl Lincoln, Bilding 197 nan Ayewopò John F. Kennedy, ak espas sou kanpis Lopital Sikyatrik Creedmoor. Vil la ak Eta a ap manke byen vit lokal ki apwopriye pou loje moun k ap chèche azil ak migran yo. Asistans federal adisyonèl pou idantifye, prepare ak opere nouvo sit sou byen gouvènman federal la posede se yon bagay esansyèl. Mwen rekonesan pou efò Administrasyon w lan ap fè pou rann Floyd Bennett Field disponib. Sepandan, gen lòt pwopriyete gouvènman federal la posede ki ta dwe disponib tou pou objektif sa a.

Katriyèmman, gouvènman federal la ta dwe ranbouse Eta a pou depans pou deplwaye Gad Nasyonal la. Eta a ap fè depans plis pase 22 milyon dola pa mwa pou sipòte apeprè 1,950 manm Gad Nasyonal, ki deplwaye nan vil la ak nan konte yo pou ede ak operasyon imanitè yo. Sa a se yon depans ki pi apwopriye pou gouvènman federal la peye. Tit 32 nan Kòd Etazini an bay moun ki ranpli fonksyon aktif anba kontwòl eta a peman ak benefis ki soti nan gouvènman federal la. Mwen konprann ke gouvènman federal la te otorize pou sèvi ak otorite Tit 32 nan tan lontan pou ranbouse eta yo pou depans ki lye ak deplwaman Gad Nasyonal pou ede ak imigran k ap rive Etazini yo. M ap mande gouvènman federal la pou I bay New York menm nivo asistans, swa atravè yon otorizasyon Tit 32 oswa atravè yon lòt mekanis finansman.

An rezime, Vil New York ak Eta New York ap deplwaye tout resous ak anplwaye ki disponib pou jere kriz imigrasyon sa a. New York se yon eta ki gen anpil talan, kapasite, konpasyon ak potansyèl. Pa gen okenn defi ki twò gwo, epi n ap mobilize pou nou jere misyon sa a. Sepandan, kantite moun k ap chèche azil ak migran k ap antre nan New York ap kontinye nan yon nivo ki wo epi ki pa sispann. Se responsabilite dirèk gouvènman federal la pou I jere ak kontwole fwontyè nasyon an. San okenn kapasite oswa responsabilite pou abòde kòz kantite migran k ap vini yo, Nouyòkè yo pa kapab asime depans sa yo. Mwen pa kapab mande Nouyòkè yo peye pou sa ki fondamantalman yon responsabilite federal epi mwen ankouraje gouvènman federal la pou I pran mezi rapid ak konsiderab jodi a pou satisfè obligasyon li anvè Eta New York.

Mèsi pou lidèchip ou kontinye demonstre anvè nasyon nou an sou pwoblèm sa a ak anpil lòt.

Ou kapab wè lèt Gouvènè Hochul te voye bay Prezidan Biden lan [isit la](#).

###